



REPUBLIKA E SHQIPËRISË

ENTI RREGULLATOR I ENERGJISË  
BORDI

VENDIM

Nr. 263, datë 28.12.2020

“MBI

**FILLIMIN E PROCEDURËS PËR MIRATIMIN E PROGRAMIT TË  
PËRPUTHSHMËRISË SË OPERATORIT TË SISTEMIT TË TRANSMETIMIT PËR  
GAZIN NATYROR, “ALBGAZ” SH.A.”**

Në mbështetje të nenit 16, të ligjit nr. 43/2015, “Për sektorin e energjisë elektrike”, i ndryshuar; nenit 47, pika 1, të ligjit nr. 102/2015 “Për sektorin e gazit natyror”, i ndryshuar; pikës 76, të Programit të përputhshmërisë, miratuar me Vendimin e bordit të ERE-s nr. 77, datë 26.05.2017; nenit 19, pika 1, germa “F”, të “Rregullores për organizimin, funksionimin dhe procedurat e ERE-s”, miratuar me Vendimin e bordit të ERE-s nr. 96, datë 17.06.2016, Bordi i Entit Rregullator të Energjisë (ERE), në mbledhjen e tij të datës 28.12.2020, mbasi shqyrtoi relacionin me nr.142/7 Prot., datë 24.12.2020, të përgatitur nga Drejtoria e Licencimit, Autorizimeve dhe Mbikëqyrjes, si dhe Drejtoria e Gazit Natyror, “*Mbi fillimin e procedurës për miratimin e programit të përputhshmërisë së operatorit të sistemit të transmetimit për gazin natyror, ALBGAZ sh.a.*”.

**Konstatoi se:**

- Shoqëria “ALBGAZ” sh.a. me shkresën nr. 143/1 prot., datë 28.10.2020, protokolluar në ERE me nr. 1123/2 prot., datë 04.11.2020, ka depozituar për miratim Programin e përputhshmërisë së Operatorit të sistemit të transmetimit për gazin natyror.
- Në nenin 47, pika 1, të ligjit Nr. 102/2015 “*Për sektorin e gazit natyror*”, i ndryshuar, përcaktohet se OST krijon një program të përputhshmërisë, në të cilin përcaktohen masat e nevojshme për garantimin e sjelljes jodiskriminuese, i cili miratohet nga ERE, si dhe metodën për monitorimin e përputhshmërisë me këtë program. Programi i përputhshmërisë përcakton detyrimet e veçanta për të punësuarit e OST-së, me qëllim plotësimin e këtyre objektivave. Përputhshmëria me programin monitorohet në mënyrë të pavarur nga një zyrtar i përputhshmërisë.
- Në pikën 76, të Programit të përputhshmërisë së operatorit të sistemit të transmetimit për gazin natyror, miratuar me Vendimin e bordit të ERE-s nr.77, datë 26.05.2017, përcaktohet se ky program duhet të miratohet me vendimin e organit përgjegjës të kompanisë OST dhe,

brenda 5 (pesë) ditëve pas përshtatjes së tij ky vendim duhet të dorëzohet në ERE për miratim. Ky Program duhet të hyjë në fuqi ditën tjetër pas miratimit nga ERE.

- Në pikën 1, të Vendimit të bordit të ERE-s nr. 109, datë 02.07.2020, “*Mbi disa ndryshime në vendimin e bordit të ERE-s nr.221, datë 20.12.2019, “Mbi disa ndryshime në vendimin e bordit të ERE nr. 179, datë 08.11.2017, “Mbi certifikimin e shoqërisë “Operatori i kombinuar i gazit natyror” ALBGAZ sh.a., të ndryshuar*”, është përcaktuar se shoqëria “ALBGAZ” sh.a., duhet të dorëzojë për miratim në ERE deri në datën 20.12.2020 Programin e përputhshmërisë të përshtatur sipas atij të miratuar nga ERE me vendimin nr. 77, datë 26.05.2017, të bordit të ERE-s, “*Mbi miratimin e programit të përputhshmërisë së operatorit të sistemit të transmetimit për gazin natyror*”.
- Shoqëria ka depozituar në ERE për miratim Programin e përputhshmërisë brenda afatit të përcaktuar në vendimin e bordit të ERE-s nr. 109/2020.
- Programi i përputhshmërisë së operatorit të sistemit të transmetimit për gazin natyror, dërguar nga “ALBGAZ” sh.a. është kryesisht në përputhje me Programin e përputhshmërisë, të miratuar me Vendimin e bordit të ERE-s nr.77, datë 26.05.2017, ndërsa pikat për të cilat evidentohet nevoja e diskutimit me “ALBGAZ” sh.a. dhe palët e interesit janë si vijon:
  - Kudo në tekst, akronimi OST (Operatori i sistemit të transmetimit) të zëvendësohet me “ALBGAZ” sh.a.,
  - Në *kreun II, Statusi ligjor dhe struktura e korporatës së OST, pika 5*, duhet të shpjegohet struktura e aksioneve të kompanisë OST, duke përfshirë dhe marrëdhënien e aksionerëve të OST me kompani të angazhuara me prodhimin dhe/ose furnizimin me gaz natyror dhe energji elektrike, nga ato që kanë ndonjë interes komercial.
  - Në *kreun II, Statusi ligjor dhe struktura e korporatës së OST, pika 6*, duhet të shpjegohet ndarja dhe pavarësia e organeve publike të cilat janë të autorizuar të përfaqësojnë të drejtat e aksioneve shtetërore nga njëra anë, dhe kompanive të angazhuara me prodhimin dhe furnizimin nga ana tjetër. Sa më sipër vlerësohet që të parashikohet dhe në Programin e përputhshmërisë së ALBGAZ sh.a.,
  - Në *kreun II, Statusi ligjor dhe struktura e korporatës së OST, pikat 6-10*, duhet të bëhet renditje e saktë e përcaktimeve në Program.
  - Në *kreun III, ndarja dhe pavarësia e OST, gërma B, Pavarësia drejtuese e OST, pika 15*, duhet të përcaktohen qartë drejtuesit e OST, sipas funksioneve që mbajnë në organet apo strukturën e “ALBGAZ” sh.a., për të cilët është e detyruar që të ndiqen kriteret e përcaktuara në pikat 15.1-15.6.
  - Në *kreun VII, Dispozita të përgjithshme, pika 76*, duhet të përcaktohet dhe Asambleja e përgjithshme, si organ drejtues i shoqërisë që miraton Programin e përputhshmërisë, pas miratimit nga Këshilli mbikëqyrës.

Për gjithë sa më sipër, Bordi i ERE-s,

**Vendosi:**

1. Të fillojë procedurën për miratimin e Programit të përputhshmërisë së operatorit të sistemit të transmetimit për gazin natyror, “ALBGAZ” sh.a.
2. Drejtoria e Licencimit, Autorizimeve dhe Mbikëqyrjes të njoftojë palët e interesit për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETARI I ERE**

**Petrit AHMETI**